

FORA NDI NDE ?



twarwaniye aha ... !!!

November 21, 2020

Gahutu nkwerurire nkubwire

Narabikwandikiye urabizi

Nkwibutsa yuko ntacyo dupfana

Nta buvandimwe nta sano

Mfitanye nawe kuva nkivuka

Ko icyo dupfana ari Ubuhake.

Erega ca akenge wibuke neza

Hari mu gihumbi magana kenda

Na mirongo itanu n'umunani

Urebe mu kwezi kwa gatanu

Ku itariki ya cumi na karindwi

Igihe nasubizaga Manifeste

Wari wakwije ku isi yose

Usaba ikurwaho ry'ibikingi

N'isaranganya ry'amasambu.

Bene wacu cumi na babiri

Bari bataramiye mu Rukali

Uzabishake ubisome neza

Ni amateka si amahamba

Nguwo umurongo dufite n'ubu

Niko biteye ukureyo amaso ...

Fora ndi nde ?

Kenyera rero ndaguteguje

Nkwice nkwice nkwirahire

Bitari Kambali ka Matene

Ngucure bufuni ngucure buhoro

Kandi ubyumve naragutsinze

Nubwo ndi muke mu ibarura

Ubu nta bwoba ngufite wese !

Kenyera rero ndigise abawe

Ninarangiza mbyigambe

Nongere n'ejo bikurye mu nda

Ubure icyo wakora wigunge

Njye nimfusha ndirire abanjye

Umfashe icyunamo by'agahato

Nuzuyaza nkureme uruguma

Nice abawe ubure aho uririra

Nubisakuza nkurege ipfobya

Nyamara ninyarukira hanze

Niyerurutse nkomeje cyane

Ngende ndirimba Demokarasi !

Fora ndi nde ?

Mpige abagabo nice abasore

Nudapfuye ature gereza

Urokotse byombi azagwe hanze

Nsige abasaza ndeke izo nzana

Abagore mbihorere mbacenge

Mbabeshyeshye uduhendabana

Nibo bayoboka bitatugoye

Tubahe imyanya ibarangaza

Bakore n'aha basaza babo

Mbeshye hose ko nagitsinze

Muby'uburinganire bw'abantu

No mu iterambere ry'abari

Kandi ari amayere nahimbye

Nzajya mbeshya injiji zitanzi

Mfate imidari ya buri kanya

Ariko iryo banga turibakinge ...

Fora ndi nde ?

Nige i Mahanga wige "nayine"

Undushe twigana ay'ibanze

Ntsinde ureba, tugupyinagaze

Usigare ugendana ako gahinda

Kuko nta ruvugiro iwanyu

Nuba n'umukozi muri Leta

Nige mpembwa ukorera zero

Nige make mpembwe neza

Wige uminuze ushome burundu

Leta intunge, wirye wimare

Bucye ndirimba uburinganire ...

Fora ndi nde ?

Nture mu mugi ngucire icyaro

Nkarabe ndimbe ucupire cyane

Nukora utwihishemo ntakuzi

Ninkuvumbura bibe umwaku

Ndeke ucuruze maze urigwize

Bucye ngutere kuwa Kajwiga

Ngukate imisoro ihanitse cyane

Irusha agaciro ibyo wacuruje

Uyabure mfunge iduka ryawe

Ibyawe mbiteze cyamunara

Ukanuye amaso amarira azenga

Ubure ukurenganura dutahe

Ubure byose nk'ingata imenye

Ugenda wicwe n'ako gahinda

SOROWA yawe uyisubizeho

Ndye iryo faranga byo gufuraha

Nawe impande utuga ibigunda

Nkwibasire ubure amahwemo

Ibyitwa ibyawo tubiguteshe

Isambu warazwe nayo uyisorere

Nubura icyo usora tuyigurishe

Nubona usigaye iheruheru

Ujye usabiriza nka Mayibobo

Fora ndi nde ?

Uhinge ugoke ngaramye iwange

Igihe utegereje gusarura

Byose mbyahuremo inka zanjye

Undege usange ari njye uregera

Uhekenye amenyo byo guserera

Uzamure umujinya w'imbwa

Ushirira hasi iyo mu murizo ...

Fora ndi nde ?

Mpakane ikitwa amoko iwacu

Nadukane Ndi umunyarwanda

Bizage bimfasha gutonesha

Nitugera ku myanya iryoshye

Mfate abatutsi ndunde hose

Ntangatange impande zose

Uzaba shefu aturuke iwanjye

Gahutu azahere mubo hasi

Ufite ifaranga abe ari uwanjye

Kugukenesha mbigire intego

Niba unkekeraho ibyo kubeshya

Vuga umuherwe ufite kuri ubu

Wagereranya n'ab'iwanjye ?

Nubisakuza ufatwe n'ingingo

Ikurega yuko ugaruye amoko

Maze ngushinje iryo vangura

Uburirwe irengero bidatinze

Nyamara iturufu ya Jenoside

Ngaruke nyubakire ku moko

Nubirwanya nkurege ipfobya ...

Fora ndi nde ?

Amayeri yanjye ntabarurwa

Mpuguza mpereye mu itegeko

Maze nkaryemera mu magambo

Ndetse kuryandika nkitonda

Kurisobanura nkaba intyoza

Utanzi neza ati dore umuntu

Ariko mu ngiro nkaba uwundi.

Ngabira abanjye maganatanu

Maze ngacangamo bane bawe

Bamwe bo kumfasha kujijsha

Waba unketse kuvangura

Ngahita nirahira ngatsemba

Wajya kumpinyuza bikanga

Bane nagabiye nkabateguza

Iterabwoba ribari nabi

Bakakumwaza bagasizora

Ngo badatakaza ako kagati

Cyangwa ikitwa amagara yabo

Ubwo nkatsindira ubwiganze

Bukantunga ntabize ibyuya !

Twarabikoze biraduhira

Na n'iyi saha tukibirisha :

Niwitegereza igisoda cyacu

Bakakubwira uko nagipanze

Urumva neza iby'iryo banga !

Fora ndi nde ?

Reka nkubwizanye ukuri kose :

Burya nakwishe kuva wa munsi

Ngutega iturufu ya Jenoside

Nkayitegura nkayenyegeza

Wakinisha kwitabara

Nkajya i Buzungu nkayigusiga

Maze bakemera ayo mabwire

Igafata neza ikaba nk'irangi

Maze icyo cyasha kikakuzirika

Ugahora iteka uri nk'igicibwa

Wisobanurira akamama

Ngaramye nigarurira ibyawwe

Nicinya icyara nkwisekera !

Ngiyo impamvu ntajya nzuyaza

Aho mbishakiye nkora akantu

Nkica abawe ntacyo ntinya

Byamenyekana nkidoga

Nkitotomba nsakuza cyane

Mvuga ko niba hari n'abishwe

Bitahwana na Jenoside !

Uwari ugiye kubindyoya

Agacecekesha akagira ubwoba

Bikantera imbaraga zindi

Zo kubikomeza ubuziraherezo !

Fora ndi nde ?

Ngiyoy imbehe itunze abanjye

Iturufu ndisha itazasaza

Nzacuruza nkirimo umwuka

Ikampera ingoma kuramba !

Nuko rero ubimenye neza

Ikosa ntazemera ni rukumbi

Ni ugushidukira ubwiyunge,

Ni ukumva mu mitwe ndwanya

Bararenze ibyo kwironda

Bashyize impande ibi by'amoko

Bakoze urubuga rwo kwiwunga

Nkuko byatubijije icyuya

Igihe IGIHANGO cyari kije

Gihuje ARENA, FDLR

Hamwe n'Imbaga y'inyabutatu

Kari kabaye iyo ntahaguruka

Ngo nshakishe bene wacu

Mbabuze kwivamo nk'inopfu !

Amoko yiyunze bigakunda

Akanjye kari kuba kabaye

Ikinyoma cyanjye kikangora

Kugicuruza ngo cyakirwe

Ingoma igahirima nk'ibuye muzi

Iyo baritereye ku manga ...

Fora ndi nde ?

Harya ngo ingufu mucungiraho

Ni ubwo bwinshi murata iteka

Nta kanama nta mugambi

Ngo Imana izabakorera byose ?

Niyo se ikunda Bizengaramye ?

Burya si buno twaje tuje

Muzashiduka tubagereje

Muri inshike mwitwa impehe

Nta kavuro nta n'ijambo ...

Imyaka myinshi nzabakanda

Mube ay'ifundi igira ibivuzo

Twiyongeze mugihumirije

Ishire inasage maganatanu

Ngiyoy vision mfite ubungubu

Ibindi ubifate nk'amahamba ...

Fora ndi nde ?

Aho muranyumvira bahuu ?!

Nakuvumbuye uragatsindwa

Ndakica Burakari twataramye

Uku ni ukwendereza birenze

Ubu mpise ndakara ndasizoye.

Uri umubisha usa na Nyamunsi

Bubi na bwiza ndwane nawe

Ndakabura Ntwari twatabaye !

Uri ikirura kabure intama

Kabure impinga ubure n'ivomo

Kabure icumbi ahitwa i Rwanda

Uri ishyano rya Gashyantare

Uri rutindi, uri icyo ntazi

Uri rupfu rubi, uri **RUPIYEFU**

Uri umwanda uteye ishozi

Uri umwaku ubuza amahirwe

Uri akaga kava i Gasabo,

Uri amakuba y'ishyano riguye !

Nakangutse ubu ndi maso

Ndaguhamurira mu ishyamba

Nze nkuvugutire ibisharira !

Kicwe n'igicunshu cy'impeshyi

N'umuravumba wumiye izuba

Mfite rubamba n'umubirizi

Nimbivangitiranya byose

Ndabikunyweshya nakuziritse

Mbigucubanure mu mazuru

Nkwine ibindi nyujije hasi

Maze nguhangamure bareba

Nabisinyiye mba ndoga Gahutu.

Iryo shyano nzarica ndimeneshe

Imana ibyumve nditabaye

Impundu zongere zanage

Niruhutse bishyire kera ...

Inama nange ndumva ari iyo

Nta kudabagira duhigwa

Tuve murayo dushake umuti

Ariko ubundi ubu kare kose

Uretse kwigira Bizengaramye

Na Ntibindeba itugeze ahaga

Ni iki cyatubuzaga ukumva ?

Gucurwa bufuni turebera

Ageze n'aho anabitubwira ?!

Gutura amarira abari kutwica

Bamwe tukigira nk'abana

Ngo nibahaga kwica abacu

Bazatureka twidegembye !

Hari uwabonye isaha n'imwe

Inzoka ihaga kuruma abantu

Cyangwa isake ibura gukanga

Ngo abashwi bose batekane

Agaca ikabonye hafi yayo ?

Naho twebwe tubone ingona

Duhite twirukira mu ruzi

Tuzi neza ko ariho irira

Aho guterera mu mpinga

Ngo tuhatore icumu n'umwambi

Duhindikire tuyiha induru !

Muze twese dushire ubwoba

Duhangare abo baduhiga

Inzira zabo tunyure nk'izo

Amayeri yabo tuyigane

Ayo majoro bita NAYITI

Batwigamba ko baraye

N'iryo shyamba bakangisha

Ngo bagenze tugihumirije

Kurimenyera ni ako kanya

Abadutanzemo bararambye .

Imbeho niba nyinshi kandi

Tuzacana igishyito twote

Wenda nibura twaruhuka

Kuvuga tubanje kurangaguza

Tuvuge twemye nk'abigenga

Ntawe utureba nk'icyo ahaze!

Ni koko ibyacu bivuze neza

Ubwenge buza nyuma y'ubujiji !

Uyu mugambi nituwupanga

Ukanozwa neza nta gihunga

Nzakubwira ubwire abandi

Niyo baba babiri nkatwe

Nabo babwire abandi nk'abo

Bigere hirya bigere hino

Kandi aho uri uhitemo neza

Uwo wizeye amenye iryo banga

Ba maneko turibakinge

Bucye bikwira igihugu cyose

Niduhagurukira rimwe twese

Abanyembaraga tukaba ibamba

Maze tukambarira itabaro

Twarutsinda vuba na bwangu

Uwarize wese agahozwa iwacu

Akaba mu igihugu kizira intimba ...

Uburyo nabwo ntibudukange

Mu mafaranga n'ibikoresho

Burya tubyibitseho tutabizi

Twige ubwenge bwo kubihuza

Maze bibyazwe umusaruro :

Iyi misoro ya Rwanda Revenu

Duhora ducuzwa nta kavuro

Na MITIWELI itugeze ahaga

Dukatwa iteka muby'ubuvuzi

Aho kutuvura bakaduhuta

N'ikigega bitiriye AGACIRO

Dufasha ariko n'inzara itwica

Dufite igwingira ry'urubyaro

Ni ukureba hafi cyane !

Dufashe nk'ayo tukayabika

Bikaba intego ya buri wese

Twayashora aho inyungu izaza

Tukayavuzza indwara itwishe

Maze ikagenda nka Nyomberi

Twava ibuzimu tugana ibuntu.

Ibi ababyumva ntimuzuyaze

Nutabyumva yihe umwanya

Abyiyumvishe, ahore bizaza

Ariko inama ni iyo ngiyo

Itavuga nk'ibi yo iragatsindwa

PAUL RUBAVU.

(source : leprophete.fr/Umuhanuzi)